

左恪靖侯奏稿續編

恪靖奏稿續編卷六十四目錄

官軍布置後路進規南路摺

籌調各軍以資厚集摺

籌畫交涉事務片

停撤歸化包頭甯夏採運片

威儀軍裁併情形片

查明襲攻瑪納斯輕進失利確情摺

會師攻克瑪納斯南城摺

請裁汰北路征軍摺

金順烈

恩優敘片

請

飭催曾國荃速赴晉撫新任片

附陳南路師期片

軍機大臣三字寄光緒二年八月二十六日奉

上諭金順奏官軍收復瑪納斯北城進攻南城並軍餉支絀情形榮全奏會克瑪納斯北城請飭桂祥暫緩赴任各摺片覽奏均悉逆匪踞瑪納斯南北兩城此次經總兵孔才等會同副都統福珠哩等軍合力圍攻疊挫賊鋒該逆於六月廿九日夜間潛開東門逃竄官軍追剿多名當將北城收復所有陣亡之卽補佐領委防禦長德卽補驍騎校委防禦祥來擬保都司銜儘先守備千總孔憲明守備銜千總樂萬德把總李發魁均著交

部從優議卹以慰忠魂逆首余小虎率眾東竄何處仍  
著金順飭令各營探踪截剿毋使滋蔓金順現今提督  
劉宏發等環築戰壘南城之賊已如檻獸釜魚自難飛  
越著卽督飭各軍奮力攻拔迅殄逆氛榮全亦當飭令  
福珠哩等併力圍剿毋稍鬆勁左宗棠前奏擬調張曜  
等軍與劉錦棠會師進規吐魯番及南路各城現在情  
形若何著左宗棠妥籌具奏前因金順請撥餉銀當令  
戶部議奏嗣據該部奏部庫存欸無多不能動撥請飭  
各省將應協該都統軍餉趕緊撥解已照所請行矣惟

金順軍營目前餉需缺乏誠恐緩不濟急軍士枵腹荷  
戈情殊可憫著左宗棠於西征軍餉內先行酌量通融  
以資接濟新授科布多幫辦大臣桂祥著照榮全所請  
准其暫緩赴任幫同辦理該營事務將此由六百里各  
諭令知之欽此

官軍布置後路進規南路摺

奏爲官軍搜剿鼠賊布置後路增調鎗礮各隊馬步各營並採儲新糧籌備軍火分道進規南路恭摺馳陳仰祈

聖鑒事竊官軍會師克復各城詳細情形業於八月初一日馳陳旋據總理行營營務三品卿銜布政使銜西甯道法福凌阿巴圖魯劉錦棠稟報烏魯木齊迪化州各城克復後昌吉呼圖壁各城客土逆回及踞瑪納斯北城逆目余小虎均於六月底先後翻山鼠竄南路瑪

納斯南城土回頭目黑寶財亦於七月初一日率其死  
黨向南竄逸餘逆猶踞城死守金順由昌吉親率各營  
赴瑪納斯督攻臣得金順函告兩城中間相聯關廂盡  
破攜大礮轟攻可期速克福珠哩書來亦云旦夕可望  
得手也劉錦棠調知各城敗竄之賊伏匿東南山谷間  
覘官軍動靜遂下令分路接山七月初六日提督譚和  
義陶生林等率所部取道七道灣赴東山提督黃萬鵬  
陝安鎮總兵余虎恩甯夏鎮總兵譚拔萃漢中鎮總兵  
譚上連取道大小鹽池墩向東南一帶節節接捕至柴



窩堡均畧有斬獲訊據活賊供稱敗賊眷口輜重已悉  
數南徙壯丁均廩集柴窩堡西百二十里達板城其白  
彥虎余小虎等敗殘股匪踞南山小東溝口嗾各賊赴  
南山大西溝水西溝板房溝一帶收秋稼備乾糧俟官  
軍進攻達板城卽乘機由南山古牧地阜康擾官軍後  
路劉錦棠一面咨商錫綸額爾慶額及東路各防營嚴  
密準備一面飭余虎恩譚拔萃率所部馬步於初九日  
仍赴鹽池扼紮派馬隊復進柴窩堡防賊橫竄是夜劉  
錦棠帶馬步各營向小東溝進發初十日黎明瞥見山

旁騎賊數十飛奔而西遂整隊急追行四十里抵小東溝口追斬四十餘騎生擒三賊訊據供稱賊眷先一日移進金口峽距小東溝約九十里劉錦棠率馬部緊追比抵金口峽惟見老幼婦女踉蹌奔逃而白余諸逆則已率黨遁逃托克遜安集延賊巢矣劉錦棠令各營收賊遺未獲秋糧十二日仍返烏垣因後路古城濟木薩以西三台滋泥泉阜康等境時有零騎剽掠不辨其土回與遊勇復派馬步各隊會同該處防營嚴密搜捕適聞瑪納斯南城土回仍堅踞如故官軍屢次猛攻均未

得手且有傷亡金順緘調數營助勦劉錦棠派甯夏鎮  
總兵譚拔萃道員羅長祐提督黃萬鵬總兵董福祥等  
率步隊六營馬隊五旗赴之八月十五日啟行尙未接  
其戰事稟報也據探安集延酋怕夏已派賊騎五千合  
烏垣紅廟逸去之賊踞烏垣南二百餘里之達板城卽  
噶遜營以拒官軍怕夏自踞托克遜築三城爲掎角與  
其悍黨守之白余兩逆入托克遜怕夏待之甚倨並勒  
其隨行賊眾薙髮易服傍三城以居察度南路賊勢守  
吐魯番者拒哈密官軍守達板者拒烏垣官軍皆所以

薩托克遜堅巢也而達板托克遜尤悍賊屬聚之區賊騎皆多至數千守禦甚固臣現咨廣東提督張曜率所部嵩武軍由哈密之西進至瞭台入吐魯番界取道七克騰木以向闢展飭提督徐占彪率所部蜀軍由巴古之間分隊探山凡通吐魯番各徑皆遍行搜捕搜過縱火焚山杜其零星伏匿其馬步大隊則由木壘河節節接捕而進木壘河地勢寬衍可容萬騎亦饒水草本通吐魯番大道雍正中岳鍾琪奏稱以重軍駐此可保必效者也七克騰木闢展賊均設卡官軍須順道攻拔以

便屯集糧餉軍火由七克騰木西行二百餘里則吐魯  
番其劉錦棠由烏魯木齊南下之軍宜先固後路計古  
城以西濟木薩三台滋泥泉阜康古牧地相距五百里  
金順所部防兵陸續調撥前進底營寥寥劉錦棠分駐  
馬步各營仍應相隨南下臣緘商劉錦棠令各防營亦  
節節接捕前進然後以金順續調錫綸馬步各營扼之  
重後路之防劉錦棠馬步金軍僅二十五營既須分布  
後路又須留守烏垣屯集糧餉軍火乃可進攻達板城  
而進攻之軍行過小東溝口地方有橫路通托克遜又

須分營扼截抄後之賊是兵力以分而愈單也張曜徐  
占彪兩軍能速拔吐魯番分趨西北以攻達板之南庶  
可牽掣賊勢與劉錦棠收夾擊之效而吐魯番昆連托  
克遜防禦又不可少疎臣撥副將秦玉盛馬隊一營交  
徐占彪撥副將武朝聘馬隊一營交張曜並令炮隊游  
擊陳文英帶開花礮及仿製短劈山開花礮助之已陸  
續成行矣臣念劉錦堂全軍分而見單飭參將侯名貴  
所管礮隊護開花後膛大礮兩尊車架開花後膛小礮  
四尊又飭解後膛七响鎗三百桿勻配子藥赴烏垣續

調滿州鎮總兵章洪勝總兵方友升帶所部馬隊兩營  
總兵桂錫楨馬隊一營均歸劉錦棠節制調遣冀可稍  
助軍鋒凡所添調馬步加撥軍械均令次第前進其張  
曜徐占彪兩軍已整齊隊伍準備啟行臣以兩軍防所  
距吐魯番道路迂直險夷不一程途遠近攸分應各確  
計日期以爲啟行先後之準其師期則由劉錦棠酌定  
庶彼此進止合度不致先後參差協力並規乃期周妥  
現接劉錦棠稟報已派十一營赴瑪納斯之調其必俟  
北路一律肅清收隊回烏乃能下兵南路師期固未可

由臣預定也至南路今歲旱蝗爲災收成歉薄官軍轉戰而前恐未能因糧於賊自不得不預爲廣籌採運以赴戎機現飭古城採新糧三萬石備運烏魯木齊巴里坤採新糧七千石合歸包甯夏已採陳糧共二萬餘石備供徐占彪一軍及防營之用哈密無糧可採由肅州玉門燉煌採運新糧接濟約可二萬石備供張曜一軍之需徐占彪西行後以總兵徐萬福三營提督范銘一營填防張曜西行後以總兵劉鳳清豫軍八百人移駐七克騰木防護運道哈密之防已咨辦事大臣明春就



近辦理明春肯顧大局所部兵勇自簡練後均精實可用與張曜極爲聯絡差爲慰幸所有布置情形謹據實馳陳伏乞

皇太后

皇上聖鑒訓示施行謹

奏光緒二年九月十七日

籌調客軍以資厚集摺

奏爲官軍南下籌調客軍以資厚集而速戎機恭摺馳

陳仰祈

聖鑒事竊臣與金順會師西征幸仗

皇威速勘北路應卽下兵南路規復舊疆南路自乾隆二十四年平定後建城凡八曰喀什噶爾曰英吉沙爾曰葉爾羌曰和闐曰阿克蘇曰烏什曰庫車曰喀喇沙爾世呼爲南八城而吐魯番別爲一部不在八城之列以其地在天山之南爲南八城門戶官吏兵民商賈赴回疆者必取道於此故志西域者附列之由吐魯番而西歷喀喇沙爾庫車阿克蘇葉爾羌英吉沙爾以抵喀什噶爾計四十九台爲程四千一百餘里較之烏魯木

齊至伊犁一千三百餘里程途遠逾三倍茲擬以劉錦棠全軍自北而南張曜徐古彪自東而西以規南路馬步各共四十餘營兵力不爲不厚然大軍前進不特後路根本之地兵力宜增卽餉糧軍火均宜層疊設局以便取用是監護不可無軍也前敵攻克城堡必須留營駐守以資撫輯是留後不可無軍也師行日遠留防之兵日增進戰之兵日減勢有固然况轉戰數千里士卒之傷亡疾病又在所不免乎額數有缺則士氣易墮歷觀軍興以來始稱精軍者末路或難復振半由乎此又

查南路地勢東南長而西北狹由吐魯番達板城西至阿克蘇尙可一路隨行無取分道並進一至阿克蘇則局勢寬濶中路一千四百里抵葉爾羌又三百六十里抵英吉沙爾又二百里抵喀什噶爾而阿克蘇之北切近伊犁葉爾羌之東南又遙與和闐相接均須分派大支扼其總要然後直搗中堅可以迅圖蕲役矣溯查道光年間張格爾之變僅踞南路西四城故長齡楊遇春兵由烏魯木齊扞克遜以進其時長清先扼阿克蘇憑河擊退逆眾扼守阿克蘇然後東四城無敢蠢動而長

齡楊遇春乃得據無賊之地以擊賊餉豐運速卒成底  
定之功此次兵由烏魯木齊進局勢依然而吐魯番達  
板城托克遜皆爲賊踞前途二千餘里皆爲賊守其致  
力難易固已判然而餉之絀兵之少又不如當時遠甚  
與其徘徊中道始請濟師正恐曠日需時事有不可測  
者臣因此躊躇再四實不得不預擬增兵伏查現駐包  
頭之統領卓勝全軍頭品頂戴記名提督鏗僧額巴圖  
魯金運昌前在甘肅甯靈一帶會剿所部淮北勇丁好  
勇尙氣甚耐勞苦金運昌整理數年愈就馴順近自黃

甫川移紮包頭軍民相安頗得時譽臣自移駐肅州金

運昌屢以在防無事堅請隨征臣時正以採運維艱難

議增竈置之而金運昌西征之志益決所部各營官共

相愆懇眾志相同聞其軍馬步五千有奇尙稱精實餉

事每月三萬數千兩皖晉各任其半已有成說矣竊維

北路解嚴山西包頭防軍本可議撤而金運昌全軍西

上尤與遠防不如近剿之說相符金運昌前在金積堡

與金順劉錦棠共事一方彼此尙稱孚洽今調其西征

既期與劉錦棠同心又適符金順昌本願合之兩美於

時局實屬相宜

臣

已南商山西撫

臣

鮑源深請其酌度

資遣合無仰懇

天恩飭下該撫

臣

迅卽轉飭金運昌乘秋末冬初迅速

開拔西來歸劉錦棠調遣庶劉錦棠中路之軍得此後  
勁可以壹意馳驅而將來克復各城有移駐之軍更番  
迭進前敵兵力常足免滯戎機遇有必須分支防勦之  
時亦可不虞竭蹶矣至金運昌西來距皖愈遠每月半  
餉似難再由院省解濟應由鮑源深與

臣

分任其半俾

該軍餉事得歸有著其軍糧另由

臣

津貼以昭公允應

否如斯伏祈

皇太后

皇上聖鑒訓示施行謹

奏  
光緒二年九月十七日

籌畫交涉事務片

再新疆與俄境毗連疆場之事一彼一此現當邊務交涉議論方滋不獨措置乖方遇事動多妨礙即語言交際偶爾失當亦足啟猜嫌爭執之萌

臣奉

恩命督辦新疆軍務身在事中邊防利害之分百年安



危之計既不敢不引爲己任當先權其輕重緩急審機  
宜以泛應合局勢以通籌庶期久遠相安詐虞可泯察  
看俄國情形雖權出一尊而事多分屬其來中國者暫  
雖馴謹有加似無尋衅生端之意然不慎之於始固有  
難策其終者現在邊方將軍都統各大臣除金順外臣  
多未留謀面一切因應之宜有緘牘所不能詳者亦有  
未可形諸緘牘者相距過遠並有各處業已見之行事  
而臣猶無所聞者事關中外交涉誠慮議論分歧無以  
示遠人而昭畫一合無仰懇

天恩飭下將軍都統各大臣於俄人交涉事件除現行事宜本有定章應各照常辦理此外遇俄事交涉新疆者應咨<sub>臣</sub>定見主辦不必先與商議致遠人無所適從庶期徑路絕而軌轍可尋論說少而爭辯自息似亦省心省事之一道也應否如斯伏乞

聖鑒訓示施行謹

奏

光緒二年九月十七日

軍機大臣 字寄光緒二年九月三十日奉

上諭左宗棠奏布爾津南路情形請調金運昌一軍出關

及籌畫俄人交涉事務各摺片覽奏均悉據稱瑪納斯  
逆首余小虎黑寶財先後率黨南竄餘匪仍堅守南城  
劉錦棠現已派隊前往助剿著金順督飭各軍迅速攻  
拔將此股賊匪就地殲除毋任他竄南路賊酋伯夏等  
分踞達板城及吐魯番城而以托克遜爲巢穴且欲俟  
官軍前進乘間繞竄後路逆謀頗狡左宗棠擬令張曜  
一軍向闢展進發徐占彪一軍由木壘河入山節節搜  
剿劉錦棠一軍由烏魯木齊南下分道並進規取各城  
布置尙爲周密現在瑪納斯城諒不日可克卽著左宗

崇飭令劉錦棠等約定師期併力進取南路迅掃逆氛  
古城以西時有零匪剽掠并著檄令錫綸嚴密防剿毋  
稍疏懈左宗棠以各軍前進兵力尙恐不敷擬調金運  
昌一軍出關歸劉錦棠調遣仍由山西協濟半餉卽著  
照所請行本日已諭知善慶等遵照辦理矣新疆與俄  
境毗連時有交涉事件輕重緩急自宜審慎以圖嗣後  
遇有與俄人交涉之事著榮全先行知照左宗棠酌度  
情形由該大臣主持辦理將此由六百里各諭令知之  
欽此

停撤歸化包頭甯夏採運片

再歸化包頭甯夏所設採運三局轉運巴里坤以供軍食肅州克復後經臣

奏請試辦雖勞費萬狀而較之關內採運糧價腳價節省甚多深得其益上年古城巴里坤辦理屯墾商農雲集仰蒙

福庇陽雨應時幸獲中稔又官兵連下數城收穫賊種秋糧亦多暫敷前敵軍食應飭歸化包頭甯夏三局停止新採速將已採未解各色糧石掃數運解巴里坤卽

行撤局所省採運經費即可撥爲古城局及軍前採買之需庶其軍民均資利益謹附片具陳伏乞

聖鑒訓示謹

奏 光緒二年九月十七日

軍機大臣奉

旨知道了欽此

威儀軍裁併情形片

再已故哈密辦事大臣文麟原帶威儀一軍應行次併情形 臣已於七月十八日詳細陳明嗣准明春咨覆擬

將威儀軍併爲兩營屯員屯長各名目一律裁革請酌  
借銀三四萬兩以便資遣上查威儀一軍前由明睿張  
曜鄴驗實存員弁勇役共二千三百零一名除此次併  
成兩營人數應留一千名及開陳安業屯丁四百四十  
七名不計外共應遣勇六百二十五名遣在營員弁一  
百四十八員名遣屯官十一員名遣屯長藍旗海查字  
識差官親兵雜項人等七十一名按照內地遣撤甘軍  
分別新老及籍貫遠近酌給川資章程共祇需銀一萬  
九千二百餘兩其原帶威儀馬步統領營哨各官有在

營出力應酌量加給者亦不過需銀二三千兩明春之  
請酌借三四萬兩原應從寬約計之數而此次點驗汰  
遣均尙核實銷除從前積欠節省日後虛糜爲數甚多  
於餉事甚有裨益臣於軍餉內勉挪湘平銀三萬兩派  
員於八月十六日解赴明春行營以爲資遣及從新整  
頓之費此項將來應歸入軍借支外營餉銀內報銷  
至威儀軍歸併之後每年實需的餉若干應俟明春酌  
定自行陳請

飭部指撥定限解濟俾收餉節兵精實效謹附片具陳



伏乞

聖鑒謹

奏光緒二年九月十七日

軍機大臣奉

旨知道了欽此

查明襲攻瑪納斯輕進失利確情摺

奏爲查明官軍襲攻瑪納斯城輕進失利確情並分別核議以明軍律恭摺具陳仰祈

聖鑒事竊額爾慶額馮桂增等襲攻瑪納斯城輕進失利臣飭總理行營營務處道員劉錦棠查明具覆再會

金順據實陳明業於本年四月十三日附片具奏茲據劉錦堂查覆本年正月間額爾慶額馮桂增等與徐學功議攻瑪納斯城原約正月二十九日會師進攻並未明定時刻嗣額爾慶額馮桂增兩營於先夕寅刻麾馬

隊前進徐學功先期未接准緘牘無從懸揣迨二十九日徐學功率所部前進行近瑪納斯城見官軍已敗出城外救援不及收隊回防馮桂增因譟救額爾慶額身帶重傷數處不能行動旋被賊擁入城中極口罵賊致被戕害兩營陣亡員弁兵勇人數查與額爾慶額及都司馮以和等前報相符此次致挫之由經劉錦棠逐加訪察參以輿論實因額爾慶額等輕進貪功所致稟請核

奏前來

臣

維額爾慶額馮桂增襲攻瑪納斯城事前未

及咨商金順詳爲布置貪功輕進以致僨事既經查明確實相應請

旨將涼州副都統額爾慶額交部議處以爲貪功輕進者戒總兵馮桂增此次戰敗被戕實由額爾慶額聳恿所致該故員平日勇銳無前疊著戰績此次業已登城因賊已警覺喉黨死關眾寡不敵致敗當額爾慶額受傷時馮桂增奮力救護以致疊受重傷卒被擁去罵賊捐軀旣於大節無虧而於額爾慶額尤稱無負可否賜卹之處出自

天恩徐學功救護不力業由金順摘去頂翎嗣帶隊隨同金順圍攻瑪納斯城尙屬出力應請免其再議所有查明額爾慶額等襲攻瑪納斯城輕進失利並分別核議緣由謹會同幫辦新疆軍務烏魯木齊都統臣金順恭摺具陳伏乞

皇太后

皇上聖鑒訓示謹

奏  
光緒二年十一月初一日

光緒二年十一月十七日內閣奉

上諭左宗棠奏查明官軍襲攻瑪納斯城輕進失利情形一摺本年正月間涼州副都統額爾慶額總兵馮桂增與統領徐學功議攻瑪納斯城原約二十九日會師進攻並未明定時刻額爾慶額馮桂增兩營先進失利迨徐學功率所部前進官軍已敗出城外救援不及額爾慶額並未咨商金順詳籌布置貪功輕進咎有應得著交部議處馮桂增身受重傷罵賊捐軀著交部議卹餘著照所議辦理欽此

曾師攻克瑪納斯南城摺

奏爲詳陳官軍會師攻克瑪納斯南城戰狀并懇

恩獎卹以勵軍心恭摺仰祈

聖鑒事竊官軍會師攻克瑪納斯南城大概情形業經

臣金順具摺馳報嗣 臣宗棠接准 臣金順咨會七月十

五日率所部馬步各隊馳抵瑪納斯南城飭統領禮字  
營提督劉宏發紮南城正東親兵營總兵張大發紮城  
東北統領英字營副將方春發紮城東南與統領振武  
營副將徐學功統帶馬隊廣州副都統福珠哩聯絡一

氣城西則令健銳營營官和振興駐紮臣金順率親軍

步隊營官泰將余致和與統帶定西營提督孔才分紮

城北令吉江馬隊翼長巴里坤領隊大臣沙克都林札

布爲游擊之師分布既定臣金順於二十日親率總兵

鄧增都司張玉林以後膛開花大礮轟城東北角樓橫

塌丈餘劉宏發方春發趁勢移卡逼紮城根臣金順與

烏魯木齊領隊錫綸麾隊於缺口直上賊乘高死抗礮

石如雨總兵李大洪能佑林泰將陸輝先冒鎗石搶登

均被子中傷登時殞命方春發張玉林憤急猛撲均帶



鎗傷張大發余致和率隊繼進更番仰攻緣城頭褊窄  
難於施展未能得手計是役鎗斃礮斃之賊約四百餘  
名官軍陣亡亦一百餘名二十六日統帶軍勝營提督  
馬玉崐遵臣金順徵調率隊抵瑪紮營城北八月初二  
日馬玉崐率隊潛登西北角樓斬守賊十餘人因羣賊  
譁覺拚死抗拒旋即收隊初三夜四鼓臣金順親督馬  
玉崐麾軍攀堞而上奪西北角樓賊負隅死鬪馬玉崐  
麾壯士連撲數次斃賊甚多適樓中賊儲火藥爲礮火  
引著棧枋倒塌勇丁被壓傷者十餘名馬玉崐亦被石

傷副將銜游擊胡耀羣冒火衝殺被鎗子中傷殞命余致和麾隊直前面帶石傷猶裹創血戰劉宏發趕於西北角缺口搶築三卡高出城頭卯刻忽南風大作烟燭蔽空遂卽收隊計是日斃賊約三百餘名官軍傷亡亦二百餘名嗣是城賊守備愈嚴晚間以繩繫柴草灌油燃燒光如白晝各面缺口均以蘆蓆裹土填砌沿城屋頂俱築垛口排設油鎗爲死守計孔才方春發復分軍於關廂內添築堅卡十一日詢知賊將出竄飭馬步各營嚴備劉宏發與營官劉占魁李大全率隊越卡截擊

殺賊數十名劉宏發左手中指被飛子擊斷馬玉崐督  
隊繼進搶奪城樓斃賊多名賊復踞短垣密排又子鎗  
伺官軍上城連環施放相持既久官軍傷亡者七十餘  
名十四日飭鄧增三等侍衛雙全以後膛開花大礮轟  
城西南兩面十五日密飭馬玉崐仍於日夕率隊向西  
北角缺口搶登劉宏發率隊繼之孔才方春發兩軍由  
北門礮樓分東西攻擊和振興張長安攻西門礮樓張  
大發張志德余致和攻東北角樓徐學功劉春元攻東  
南角樓屆時

臣

金順馮高調度飭營務處委員知縣長

庚員外郎周先檀佐領恩澤光祿寺署正余應鈞分面督攻各軍或肉薄而登或緣梯猱上斃悍賊多名西城門樓匿賊蜂出官軍猛進賊既敗復又回撲如是者十數次定西營營官總兵張太發杜生萬緣城直上均被鎗傷斃命總兵銜副將司世道把總邵芝游擊楊占魁甫上城頭或中鎗傷或被矛刺皆逾時而殞計是役斃賊約七百餘名官軍陣亡二百餘名十七日總統湘軍西甯道劉錦棠派湘軍營務處道員羅長祐統領湘左軍甯夏鎮總兵譚拔萃統領旌善馬隊提督黃萬鵬統

領董字營總兵董福祥各率所部馳抵瑪納斯助剿

令紮營城南及西南隅高築礮台並與

臣

金順所部分

段修掘長壕二十六日工竣適署伊犁將軍

臣

榮全抵

瑪會勦二十九夜飭方春發由關廂內掘成地道九月

初一日午刻舉發轟塌城身二丈餘方春發麾隊從缺

口人賊憑城內短垣密施鎗礮牆上磚石紛飛未能搶

進湘軍譚拔萃等同時由南面進攻亦因城頭賊眾密

布無隙可乘開放大礮數十子飛入城中旋即收隊訊

據難民供稱賊中偽元帥韓刑臆已被官軍礮斃初二

日早臣金順所部與湘軍仍由缺口進攻賊預豎木柵加裹濕毡以擋鎗礮旌善旗旗官都司崔偉督隊猛攻手刃數賊臂中矢傷拔矢疾戰賊拚死抗拒遂仍收隊回營計是役官軍陣亡勇丁十九名受傷弁勇九十五名十二夜方春發復於關廂內掘成地道湘軍營務處羅長祐及譚拔萃董福祥等仍由缺口進攻臣金順與榮全親督方春發馬玉崐各軍由北城樓進攻天色向明地雷舉發轟塌城身兩丈餘各壯士奮勇擒至斃賊無算忽南風大作烟塵障天咫尺莫辨乘勢猛撲提督

楊必耀持刀督戰被鎗子中傷殞命孔才舉旗繼進亦  
被鎗傷計是役官軍傷亡百九十餘名十六十七等日  
賊乘夜越壕經官軍鎗礮擊走旋又復來湘軍營官提  
督湯秀齋停止更鼓飭守壕弁丁靜伏壕邊并備繩索  
鐵鈎密排鎗礮待之夜深賊果復至鎗礮排擊斃賊頗  
多有三賊墮入壕溝官軍用繩繫鈎引之而上據供均  
係西河營賊黨原籍或西甯或河州四城中糧盡無路  
可竄逆首韓刑膿旣斃海晏接充頭目遣令偵探虛實  
以便乘間竄走訖畢斬之十九夜三鼓海晏赴徐學功

營乞撫稟

臣

金順示諭呈繳馬械細獻各迎首然後造

餘眾名冊聽候點驗分別辦理海晏願即遵辦二十一

日本明賊眾二三千人突出西門老幼婦女居中悍黨

持鎗械排隊夾護

臣

金順知其有詐飭所部各營列隊

城北湘軍列隊城南皆嚴陣以待另撥馬隊分布隘口

以防竄逸一面令徐學功向前開導諭令拋棄鎗械仍

准免死僞元帥何碌忽開放洋礮喊眾撲撲徐學功立

麾部卒直前擒何碌斬於陣前各賊目及悍黨棄眷猛

撲譚拔萃董福祥等督隊奮擊

臣

金順所部由北面截



殺而來賊眾左衝右突斃者大半偽元帥黑峻見勢不  
支以洋鎗自斃其逸出之賊經臣金順所部與湘軍馬  
隊及榮全額爾慶額所派各隊分途追斬經遺城中匿  
賊經步隊一律搜斬老幼婦女悉釋勿誅湘軍營官湯  
秀齋生擒偽帥馬有財與臣金順所部生擒偽帥海晏  
王奇玉馬受等概由臣金順會同榮全提訊極刑處死  
其韓刑膿黑峻等尸於克城後與肇亂之偽清眞王妥  
得磷尸骸一併挖掘戮以示眾此二十一日官軍會師  
克復瑪納斯城擒斬首逆殲除悍黨之實在情形也臣

宗棠續接總理行營營務處西甯道劉錦棠稟起湘軍  
戰狀核與臣金順咨報各情相符竊維新疆北路烏垣  
迪化等城克復後陝回白逆等與昌吉呼圖壁瑪納斯  
北城踞逆先後向南竄逸維瑪納斯南城賊黨恃其城  
小而堅負隅死守官軍會師圍攻計兩月餘傷亡精銳  
甚多幸賴

皇上威福將士一心俾積年悍賊悉數殲除在事諸軍  
功績卓著合無仰懇

天恩先加甄別以昭激勸

賞穿黃馬褂記名提督業普鏗額巴圖魯劉宏發克復  
烏魯木齊各城案內已保頭品頂戴三代正一品封典  
頭品頂戴記名提督博奇巴圖魯馬玉崐克復烏魯木  
齊各城案內已請

賞穿黃馬褂此次均懇

恩施破格優獎記名副都統巴里坤領隊大臣庫楚特  
依巴圖魯沙克都林扎布克復烏魯木齊各城案內已  
保頭品頂戴三代正一品封典此次應請

交部從優議敘記名提督矯勇巴圖魯孔才請

賞給頭品頂戴儘先副將霍隆武巴圖魯方春發克復  
烏魯木齊各城案內已保總兵請

賞穿黃馬褂此次請以提督

記名簡放並

賞給頭品頂戴三等侍衛雙全請

賞二等侍衛並

賞給勇號都統銜記名副都統博清阿巴圖魯依精阿  
請

賞穿黃馬褂候選員外郎周先胤克復烏魯木齊各城

案內已保知府花翎此次請

實加道銜記名總兵克勇巴圖魯劉占魁記名總兵武  
勇巴圖魯龍得勝記名總兵勉勇巴圖魯李懷興以上  
三員克復烏魯木齊各城案內已保提督清字勇號此  
次均請

賞加頭品頂戴劉占魁並請

賞穿黃馬褂儘先副將剛安巴圖魯徐得彪克復烏魯  
木齊各城案內已保總兵提督銜此次請以提督  
記名簡放並請

賞穿黃馬褂藍翎荆州駐防黃旗蒙古佐領恩澤克復  
烏魯木齊各城案內已保協領換戴花翎此次請以副  
都統

記名簡放先換頂戴記名總兵鄧增克復烏魯木齊各  
城案內已保提督

賞穿黃馬褂此次

賞給三代正一品封典儘先副將資勇巴圖魯劉萬發  
克復烏魯木齊各城案內已保總兵提督清字昂號此  
次請以提督

記名簡放並請

賞加頭品頂戴記名總兵羅永興克復烏魯木齊各城  
案內已保提督此次請

賞加頭品頂戴副將銜江西補用恭將剛勇巴圖魯余  
致和克復烏魯木齊各城案內已保副將總兵銜清字  
勇號此次請以總兵

記名簡放並請

賞穿黃馬褂知州銜山西補用知縣長庚克復烏魯木  
齊各城案內已保直隸州知府銜此次請免補直隸州

以知府仍留原省歸候補班遇缺儘先補用並請  
賞加鹽運使銜副將銜叅將彪勇巴圖魯徐學功請免  
補副將叅將以總兵

記名簡放並請

賞加提督銜

賞換清字勇號儘先副將固勇巴圖魯孫復勝請免補

副將以總兵

記名簡放並請

賞加提督銜



賞換清字勇號副將銜儘先游擊經勇巴圖魯黃古彪  
克復烏魯木齊各城案內已保叅將兩代二品封典此  
次請免補叅將以副將儘先卽補並請

賞加總兵銜

賞換清字勇號副將銜儘先叅將安勇巴圖魯張志德  
儘先叅將鋒勇巴圖魯張富貴以上二員均請免補叅  
將以副將儘先卽補並請

賞加總兵銜

賞換清字勇號副將銜儘先游擊靖勇巴圖魯李得林

副將銜儘先游擊鹿勇巴圖魯萬長發以上二員均請  
免補游擊以叅將儘先卽補並結

賞換清字勇號儘先叅將克勇巴圖魯張長安請免補  
叅將以副將儘先卽補並請

賞於總兵銜

賞換清字勇號副將銜儘先叅將和振興請免補叅將  
以副將儘先卽補湖北撫標補用游擊李大全請免補  
游擊以叅將仍留原標儘先卽補並

賞加副將銜

宣祐勇號光祿寺候補署正前應鈞請以知州歸部不  
論雙單月遇缺儘先前卽選並請

賞戴花翎湖廣督標補用游擊卓勇巴圖魯李代興請  
免補游擊以叅將仍留原標儘先卽補並請

賞加副將銜

賞換清字勇號湖北撫標補用都司匡勇巴圖魯李復  
盛請免補都司以游擊仍歸原標儘先卽補並請

賞加副將銜

賞換清字勇號儘先都司楊金發請免補都司以游擊

新編名臣  
儘先卽補並請

賞加副將銜

賞給勇號藍翎儘先都司柴洪山請免補都司以游擊

儘先卽補並

賞加副將銜

賞給勇號總管銜儘先佐領驍騎校岱通阿請

賞給勇號儘先防禦驍騎校委叅領春凌請免補防校

以佐領儘先卽補軍功范忠克復烏魯木齊各城案內

已保守備花翎都司銜此次請免補守備以都司儘先

卽補並請

賞加游擊銜

賞給勇號五品花翎委防禦哈勒他爾

賞給勇號儘先守備驤勇巴圖魯張玉林克復烏魯木

齊各城案內已保都司游擊銜此次請免補都司以游

擊儘先卽補並請

賞加副將銜

賞換清字勇號五品花翎千總邊生有請免補千總以

守備儘先卽補並請

賞加三品頂戴

賞給勇號五品藍翎儘先把總孔榮仙生祿李伏尹紹祿藍翎儘先把總王振海以上五員均請免補千把以守備儘先卽補並請

賞換花翎藍翎千總崔正邦魯明珠以上二員均請免補千總以守備儘先卽補並請

賞加都司銜

賞給勇號五品軍功秦漢翁請以守備儘先卽補並請賞戴花翎把總何長春請免補千把以守備儘先卽補

並請

賞戴花翎

賞加都司銜都統銜記名副都統蘇額爾巴圖魯薩英  
阿請

交部從優議敘提督銜甘肅補用總兵精勇巴圖魯桂  
錫植請

賞換清字勇號

賞穿黃馬褂頭品頂戴記名提督甘肅甯夏鎮總兵雲  
騎尉世職噶什普祥巴圖魯譚拔萃請

旨照一等軍功例從優議敘花翎按察使銜留陝遇缺儘先題奏道羅長祐請

交部從優議敘記名總兵阿爾杭阿巴圖魯董福祥記名總兵倭欣巴圖魯張俊均請

賞加提督銜

賞穿黃馬褂記名提督伯奇巴圖魯黃萬鵬頭品頂戴遇缺題奏提督阿克丹巴圖魯湯秀齊均請

交部從優議敘花翎留甘補用都司崔偉舉大才禹中海馬正國禹益長等五員均請免補都司以叅將儘先



補用崔偉並請

賞給勇號花翎補用守備李金良請免補守備都司以游擊儘先補用記名提督威勇巴圖魯湯仁和請

賞換清字勇號此外出力員弁勇丁容卽查明彙案保奏陣亡擬保提督記名總兵西拉綱阿巴圖魯李大洪總兵精勇巴圖魯張大發等一員此次均冒險登城血戰捐軀死事尤爲慘烈懇請

敕部各照提督陣亡例從優議卹李大洪並懇

加恩予諡擬保副將銜游擊胡耀羣擬保都司儘先守

備健勇巴圖魯杜生萬擬保守備儘先把總邵芝總兵  
銜湖廣督標補用副將振勇巴圖魯司世道總兵銜副  
將烈勇巴圖魯熊佑林副將銜儘先游擊楊占魁副將  
銜恭將陸輝先張清福恭將銜游擊廖全勝都司宋全  
忠陳如恒孔萬生何元新張有德何起發守備羅金山  
池宗發刑萬一丁占魁肅得勝楊達勝陳得勝鍾自運  
肅保平李玉卿張永發燕玉龍孫榮貴汪洪昌焦明清  
王廷選范國勝沈松林何紹明章長明詹水祥劉定邦  
胡元發張守榮丁總岳凌雲吳大喜余廣德宋懷成王

有富劉得功全樂天許能行王貴生侯得功張炳榮趙  
金山王萬銀朱保忠王光祿陳廣泰張青蓮裴雲友把  
總張金標高文彬李福馬升王才周國安胡得勝賴明  
山嚴得勝李保臣余化明胡應福方祥開周保青張福  
王經綸趙志友外委袁吉清馬保山趙鳳魁張大發楊  
來貴楊正春經制李有遇缺題奏提督甘肅甯夏鎮屬  
靈武營叅將穆精阿巴圖魯楊必耀記名提督霍仰春  
巴圖魯鄧勝友副將胡俊升二品頂戴叅將馮金山游  
擊聶秀春都司苗生有都司銜守備黎積善守備陳福

順于總楊添福周祥發連金城文義和把總成華庭張  
得榮王得能范得勝馬迎朝丁洪發歐陽清鄭儒選周  
蘭柱軍功版春華李榮貴謝曉全胡得雲易瑞祁曹萬  
楚蘇有才李全福鍾光德龐春和劉向成從九職銜王  
道政等一百十五員名均係血戰捐軀深堪憫惻應請  
旨飭部各照官階從優議卹餘俟查明彙奏所有官軍  
會師攻克瑪納斯南城戰狀詳細情形謹合詞恭摺具  
奏伏乞

皇太后

皇上聖鑒訓示施行謹

奏  
光緒二年十一月十一日

請裁汰北路征軍摺

奏爲新疆北路肅清餉源日涸擬請減汰北路征軍期  
收餉節兵精實效恭摺陳仰祈

聖鑒事竊維瑪納斯南城既克北路一律肅清官軍方  
圍下兵南路掃蕩而前北路所宜籌者防南路所宜籌  
者勦大致判然雖南路同是辦賊不宜有畸輕畸重之  
分而兵數應增應減要自有辨主勦之軍步步向前步

步顧後克復一城一堡卽宜分兵駐守要隘衝途均須設局防護以通運道而速文報程途愈進愈遠兵力愈分愈單其不得不預籌增調以爲之備固也防軍但就地勢通籌城堡要隘以夷險衝僻定兵數多少別籌游擊之師備緩急策應防守之兵步宜多而騎可少策應之兵步可少而騎宜多地有定形兵數固可得而定也總計南路征軍劉錦棠由烏魯木齊南進馬步約二十九營張曜自哈密西進馬步共十五營有奇爲一支徐占彪自巴古之間西南進馬步五營有奇爲一支統計

不過四十餘營臣慮將來屢分見單不得已始有請調  
金蓮昌馬步全軍之奏然以人馬實數計之所增亦不  
過十營而已北路金順所部二十餘營及接統景廉所  
統十九營號稱四十餘營按照步隊每營五百人馬隊  
每營二百五十騎核算人馬之數較南路征軍約畧相  
等除伊犁尙未收回不計以驛站程途計之則北路較  
南路縮二千里有奇兵之可議減汰一也北路景廉所  
部先本三十餘營金順接統挑存十九營合之金順舊  
部及新增馬步二十餘營爲四十餘營不爲不多矣月

餉多至二十二萬兩較之劉錦棠現統各軍餉銀多至十二萬兩有奇而勢力未能一律如非分別汰減任其虛糜弱者與壯者勇者與怯者同一缺餉何以鼓舞羣情收戰勝攻取之效餉項以積欠而愈薄兵氣以缺餉而愈疲將何以戰何以守且恐因循日久患有不可勝言者兵之急宜減汰二也金順所部四十餘營步照五百人一營馬照二百五十騎核算現存實數缺額太多難以覆按若就現存實數裁汰疲弱歸併成營勇丁得有的餉自期翕服其娶有妻室願留口外者准其酌借



牛力籽種撥荒絕無主地畝令其承墾秋後以糧抵還  
仿古徙民實邊之意而無其勞費近時古城巴里坤屯  
墾辦法多用汰遣客軍適值歲稔價平屯丁獲利比薪  
瑾倍徙人情樂趣卽其明驗其空缺之營哨各官及汰  
遣之勇丁願留日外者亦准一律安插非徒節餉亦可  
實邊此時行之事尤易舉兵之應及時減汰者三也金  
順所部營數計四十餘營每年應得正餉二百六十餘  
萬兩合計今歲所得實餉不過五十餘萬兩欠數約二  
百萬兩上下其賴以敷衍尙未決裂者該軍軍糧自本

年三月以後至今由臣古城巴里坤哈密各局及俄糧  
項下撥給者五百六十餘萬斤脚價牽算共實銀約六  
十餘萬兩而前此供支該軍軍勝英字等營糧料尙不  
與焉金順赴瑪納斯後臣聞綏來屬地西湖一帶商人  
販運伊犁淨糧價極平減屬其趕緊定買金順以無款  
爲言臣比飭西征糧台勉湊銀八萬兩給之計臣軍墾  
解該軍之數已過該軍所得協餉之數而軍心缺望仍  
所不免若協款仍前延不解到臣軍餉源已涸無從分  
潤該軍後此情形實有不堪設想臣與金順同辦一

事休戚共之雖該軍自有專餉亦難忍置應懇

天恩飭部迅速從長計議金順一軍月餉既無可改撥  
應否於欠解各省酌提巨款限期解到以濟急需並懇  
飭發部款四十萬兩交金順祇領作爲裁遣之費仍歸  
該營大餉扣回實成金順將所部分別裁汰歸併作爲  
馬步二十營以後部撥的餉卽照二十營核算並從寬  
給採糧開屯駝乾馬乾銀兩庶事歸核實可固軍心而  
各省應協該軍之款以後減半實解事體從容當可不  
至仍前延誤矣謹將金順全軍宜減汰歸並情形據實

陳明伏乞

皇太后

皇上聖鑒訓示施行謹

奏  
光緒二年十一月十一日

金順懇 恩優敘片

再瑪納斯南城之克金順所部苦戰日久傷亡甚多茲  
准詳陳戰狀咨請具奏並分別擬保請卹前來

臣謹照

咨核酌會銜具

奏請

臣金順自會師進剿連復數城因單銜陳奏未敢自敘  
勞績而勦勦疊著已在

聖明洞鑒之中現值北路一律肅清可否邀

恩優敘山自

聖裁至原咨擬保各員如涼州副都統額爾慶額此次  
在事出力本應列保惟前次襲攻瑪納斯失利甫經查  
明具

奏請

旨交部議處應俟欽奉

諭旨接准部文再行敘奏又烏魯木齊領隊大臣錫綸  
經臣奏委督帶馬隊數月之久於接事後如何整理收  
發餉項及前敵一切事宜從無隻字呈覆近經金順奏  
派該員回防東路始據該員咨呈帶定營馬隊百餘騎  
回抵古城查與金順原奏不符旋據暫帶定營馮以和  
等稟稱錫綸於收到餉項後並未分給該兩營情詞迫  
切現正行查一面札調該營入關分別汰遣應俟查明  
此案虛實再行酌核辦理謹一併附陳伏乞

聖鑒訓示謹

奏 光緒二年十一月十一日

請 飭曾國荃速赴晉撫新任片

再前讀邸抄知河道總督曾國荃調補山西巡撫深爲  
幸慰查陝甘北路均與山西迤北一帶相通關外北路  
肅清正可聯絡一氣從長計議爲省兵節餉之謀甘肅  
茶務壞於晉商行銷無引私茶由北路浸灌西路現值  
北路肅清正宜及時籌辦爲化私歸官之計曾國荃與  
臣素相契洽勇於任事本所深知合無仰懇

天恩飭催速赴晉撫新任冀於時務有裨謹據實附片

陳明伏乞

聖鑒施行謹

奏 光緒二年十一月十一日

附陳南路師期片

再大軍進規南路一切布置情形已詳陳在案適因瑪納斯南城未克需軍助剿劉錦棠分軍赴之戎機遂滯比九月二十一日藏事原派馬步各營收回已在十月正值大雪封山冰凌凝結之時師行不便且劉錦棠自前赴南路接剿逸賊行次感受瘴氣致染沈疴派營赴



瑪納斯時卽已困憊難支浸至不省人事迨由古城覓  
醫診治始就痊可然旋愈旋發尙未復元而所部弁丁  
因轉戰而前未得休息旋又收割賊種秋糧勞乏之餘  
多染疫氣幸入冬時證漸次減退稍予調養可冀如常  
臣函致劉錦棠酌定師期以明歲春融爲妥屆時金運  
昌一軍亦可趕到後路可期周密現正加撥官民車馱  
駝隻速運軍火糧料存儲哈密古城以便層遞灌運免  
致臨時竭蹶其張曜徐占彪兩軍亦均照辦巴古中間  
及濟木薩至烏魯木齊運道時有遊氛出沒伺間劫掠

已飭各防營照護接剿矣謹附片陳

奏伏乞

聖鑒謹

奏光緒二年十一月十一日

軍機大臣 字寄光緒二年十一月初十日奉

上諭左宗棠金順奏攻克瑪納斯南城大概情形並布  
置防守各摺片瑪納斯賊匪負隅已久現經金順親率  
所部會同湘軍奮力進攻於九月二十一日將南城攻  
克擒斬逆首何碌馬有財等餘黨搜殺無遺金順現飭

禮字等營及孔才所部駐紮瑪納斯城並派英字四營  
暫駐呼圖壁城該將軍擬回紮昌吉縣城著卽督飭各  
軍認真防守毋稍懈弛附近民衆并著飭令該地方官  
妥爲撫綏俾得各安生業現在北路大致旣經肅清自  
應規復南路陝回白彥虎素稱狡猾與帕夏同踞南城  
合謀困圍亦在意中近日南路賊情若何劉錦棠張曜  
等軍曾否剋期進發著左宗棠督飭諸軍乘此聲威迅  
速規取吐魯番等城以收掃穴擒渠之效金順另片奏  
請飭催山西等省餉銀已諭令各該省迅解矣將此由

六百里各諭令知之欽此

恪靖奏稿續編卷六十五目錄

請飭各省關迅籌解濟摺

訊明吉爾洪額等被參各情摺

金順劾奏吉爾洪額均有實跡可按片

官軍三道並進會克吐魯番兩城摺

覆陳科屬零賊竄擾片

奏請飭催卓勝軍欠餉片

覆陳移屯實邊摺

請飭各省關迅速籌解濟措

奏爲餉源已涸請

旨飭下各省關提前迅速籌措大批解濟以應急需恭摺馳陳仰祈

聖鑒事竊臣軍出關餉需上年奏蒙

天恩准撥部款二百萬兩各省提前解三百萬兩

飭各省協款毋得以八成自限如不能解至八成以上

部臣從嚴參辦并

恩准借用洋款五百萬兩臣念部款二百萬兩各省提

前解三百萬兩均是餉復蒙

諭飭各省協款以八成上解餉事可期敷衍毋庸借用  
洋款徒耗息銀又前次所借洋款尚須一年各省始可  
清還完結若仍於上年議借則新借之款并於本年內  
劃還本息亦慮各省關周轉維艱故上年卽不復籌及  
借用洋款惟出師絕域距協餉各省在數千里萬里以  
外而統計已到之餉實祇供九月十月之需誠慮各省  
催解不前餉源中斷一面具

奏請

飭部臣分別行催一面豫籌借用洋款定以本年歲借  
分年劃還本息庶事體從容各省亦得稍紓籌措其洋  
款尙未籌措之先由臣飭滬鄂陝各台局息借華商巨  
款暫資接濟議俟洋款借到分批劃還旋據各台局稟  
息借華商銀一百一萬兩迅解來甘均一分二釐給息  
并飭上海轉運局員江西補用道胡光墉訂借洋款庶  
便劃還華商免致失信而息銀亦期節省旋據胡光墉  
稟陳商借各情臣比令就可恃巨款訂借成交以憑分  
別奏咨立案其銀限以本年三月內到甘適各省關協



餉於上臘源源而來不但上年十一月及年關滿餉得以開支加意撙節卽本年春季亦資敷衍竊計屆時洋款可望到甘除劃還華商外尙有巨款堪資接濟當無臨渴掘井之虞不料上海洋款被許厚如託詞蒙借洋商各起猜疑卽前此親赴胡光墉處承認出借之洋商亦腴縮不前情形頓異據後路糧台道員王加敏稟知接胡光墉緘稱訂借洋款事多夾雜雖極力籌辦未卜有成與否而進攻南路及規取吐魯番各軍已指春融爲師期奏調填駐烏魯木齊馬步全軍與防護古城迤

西及巴古一帶運道馬步各軍業經資遣出關所需餉  
糧採運正雜津貼各款至繁且鉅均非預付見銀不辦  
懸軍深入勢難稍有停待洋款既不足恃協款又無見  
成巨數可指何以迅赴戎機與思及此殊深焦灼合無  
仰懇

天恩飭各省關將應協本年西征軍餉提前速解四百  
萬兩餘均解八成以上俾兵機順利得免意外之虞則  
大局之幸亦微臣之幸也如一時未能驟集巨款卽照  
陝西撫臣譚鍾麟前奏各省分向本地富商議息借湊

先期解甘仍各按每月應解之數分期劃還商款而息銀仍由西征餉內劃扣在各省無洋款期限迫促之類無墊息虛耗之累似於各省無損而於臣軍得有實濟可否并請

旨飭下部臣查照譚鍾麟呈開各省應解新餉原單迅速酌議不勝惶悚待

命之至謹憑情馳陳伏乞

皇太后

皇上聖鑒訓示施行謹

奏  
光緒三年三月初六日

訊明吉爾洪額等被參各情摺

奏爲遵

旨訊明已革墨爾根城副都統吉爾洪額及依勒和布  
永成等被參各情恭摺具陳仰祈

聖鑒事竊臣欽奉光緒二年六月二十九日

上諭金順奏帶隊大員不遵節制阻撓進隊請旨懲辦  
一摺墨爾根城副都統吉爾洪額前因患病請假該員  
所帶馬隊經金順派員接統抗不交代構言煽惑迫金

順派隊迎護軍糧該員復敢縱兵阻撓實屬任性妄爲  
記名副都統依勒和布驍騎校委參領永成主謀唆鬧  
幾釀事端吉爾洪額依勒和布永成均著卽行革職交  
左宗棠查辦以肅軍律欽此又奉光緒二年七月初七  
日

寄諭前因金順奏副都統吉爾洪額不遵節制各節當  
經諭令將該革員等解赴左宗棠軍營查辦茲復據金  
順奏稱吉爾洪額依勒和布已率隊向北逃逸烏科兩  
城沿途台站見有該營餉銀難保不搶截滋事等語覽

奏不勝詫異著額勒和布車林多爾濟杜嘎爾托倫布  
保英桂祥慶春奎昌查明吉爾洪額等無論行抵何處  
卽行嚴拏解赴左宗棠軍營毋令在途滋事一俟解到  
後卽著左宗棠嚴行查辦按律懲治原摺并呈詞著鈔  
給左宗棠閱看吉爾洪額等以帶隊大員豈竟不知法  
紀何以胆大妄爲至於此極是否金順有不善駕駛操  
之過激之處并著左宗棠一併查明據實具奏見當用  
兵喫緊之際金順務當隨時相機調和將士以期共奏  
膚功毋得激切從事致失軍心將此由六百里各諭令

知之欽此本年正月十七日准科布多參贊大臣保英  
遵

旨委員墨麟沙蘊喜押解吉爾洪額依勒和布永成等  
到臣行營比發交署安肅道福裕收審適甘涼道鐵珊  
因公到肅並委鐵珊會同福裕研訊確情錄供詳辦茲  
據詳覆吉爾洪額供稱蒙訊抗不交代禁錮沙克都林  
札布并令眾兵索取欠餉一節當沙克都林札布前來  
接統革員實已銷假兵丁因聞沙克都林札布曾在科  
布多頭批欠餉項下截留銀八千兩恐接統後發餉輟

輻聚集營門求緩交代待發欠餉當時兵清洶洶革員  
恐滋事端因呈明暫緩交代以便徐爲開導至馬匹在  
廠時有趕回換牧之事若果倡亂自應機密豈有聲張  
通衢使人知覺之理蒙訊勒令興祿抗拒興祿不從強  
脅入夥一節查興祿所帶兵丁曾經鼓譟興祿旋即彈  
壓自帶赴濟木薩在興祿固無抗拒之事在革員尤無  
迫脅之理蒙訊領銀置貨以貨折餉侵吞空餉一節查  
從前派去領餉員弁間有夾帶私貨藉助旅費之事去  
年欠餉已經十八箇月概未到營尙待餉到清償糧價



借款并無多銀可任委員販貨漁利至六起亡故兵丁  
均隨時咨報有案旗丁尤非勇丁可比可以侵吞缺額  
蒙訊依勒和布永成主謀唆開阻撓出隊爭鬪互傷帶  
隊逃逸一節查吉林新起與黑龍江新起於奉調開拔  
口角滋鬧革員聞信親往彈壓息事彼時依勒和布永  
成二人因病并未前往該各兵丁因革員將卸營務恐  
欠餉無著必欲欠餉到營清發方肯歸沙克都林扎布  
接帶眾口沸騰開導不聽又見營總全福明圖善先後  
逃逸以爲赴科截取餉銀相率譁潰革員得報卽令依

勒和布及各扎蘭追趕革員不得已祇好一面呈報親至老龍布拉一帶再三開導節七彈壓及博東齊河地方始行截齊各逃潰兵丁借發餉銀四萬八千兩按名散放眾心始安若果蓄意倡亂何以尙有員弁及軍裝行李留住古城至全福明圖善不能禁約兵丁先行赴濟木薩又恐都統金順見責謊稟各情以圖本身脫卸地步凡都統金順所參各節均出有因不敢妄辯總由革員患病已久荒廢營務致兵丁偶因欠餉未到正當交卸不能約束以致譁潰罪實難辭據依勒和布永成

供詞大略相同永成弁稱身係徵末參領管營一扎蘭  
與營主勢位懸殊何能爲其主謀弁求明察各等供詳  
請具

奏前來臣維吉爾洪額歷次因病告假金順始派員接  
帶據供起病在未得委員之先數日然委員業經到營  
自應及時交卸卽所統官兵因欠餉未到慮其無著亦  
宜明白開導身留營中听候核算交代豈可諉稱開導  
各兵不听任其誣濫據供各兵疑全福明圖善先後逃  
逸以爲截取科布多餉銀相率誣濫查全福明圖善潛

赴金順軍營原因全軍譁潰慮爲牽帥不能自由故潛踪赴營自明心跡足見當時各兵洶洶吉爾洪額等不能自主尙非盡屬虛詞惟全福明圖善尙知投歸主帥急明心跡爲是該革員等何以見不及此公然隨隊北行雖據供依勒和布永成由吉爾洪額派令追趕各兵吉爾洪額旋亦跟踪前往親至老龍布拉一帶節七彈壓及博東齊河始行截回縱圖追趕各兵截回歸伍係屬本心然查其折回乃在烏里雅蘇台科布多奉諭旨嚴拏之後何能因其有所藉口遽謂情有可原糾

核吉爾洪額等所犯情節均由其專餉初次被沙克都林托布奉扎截提移還欠款軍情不無缺望嗣因委代統領又卽沙克都林札布各兵疑接替之後應得餉項將歸無著遂聳踊吉爾洪額等抗不受代任意北行吉爾洪額又因前次誣訂金順各款經臣遵

旨按款查明覆陳均屬失實恐不爲金順所容遂至鹵莽糊塗激成此舉疊奉

諭旨交臣嚴行查辦按律懲治臣查訊供詞吉爾洪額所犯不服調遣不遵節制任性妄爲雖供吐未能盡實

而情罪已屬顯然依勒和布永成雖供無主謀唆鬧等情然不能諭禁弁兵復與吉爾洪額隨隊北行論罪何能未減臣既奉

諭旨嚴行查辦按律懲治自應詳繹律文博考成案以期允協而肅戎經惟該革員等所犯按之軍律刑律中樞政考處分則例治罪專條情罪均不相符若仿軍興法擬辦未免過重竊維吉爾洪額依勒和布永成等任意妄行正當用兵之際法本難寬然幸

天戈所指旋克數城該軍雖背道而馳於大局尙無貽

誤奉

旨帶隊回營沿途約束官兵晝夜趨行并無違犯而該  
革員等征戰著績屢膺保獎追念前勞又尙有功可議  
合無仰懇

天恩逾格將已革鄂爾根城副都統吉爾洪額記名副  
都統依勒和布驍騎校委參領永成均由死罪上減等  
發遣閒廣交將軍都統嚴行管束以昭法外之仁抑折  
獄不厭精詳或請

旨飭交兵部刑部會議定擬具

奏出自

聖裁所有遵

旨密辦吉爾洪額等緣由恭摺具陳伏乞

皇太后

皇上聖鑒訓示施行至吉爾洪額呈遞親供已鈔送軍  
機處備查合併聲明謹

奏光緒三年三月初六日

軍機大臣 字寄光緒三年三月二十一日奉

上諭左宗棠奏餉需孔亟請飭各省開提前措解一摺



西征軍務正在得手目下已屆春融所有進攻南路及規取吐魯番各軍需餉甚急亟須速籌巨款以期無誤戎機各省關應協本年西征軍餉著沈葆楨吳元炳劉秉璋梅啟照衛榮光李瀚章翁同爵劉坤一張兆棟王文韶李慶翱文格李元華鮑源深裕祿丁寶楨何璟丁自昌各按照該省應解西征餉數迅速提前合解四百萬兩餘均解八成以上毋得稍有遲延見在訂解洋款既不足恃各省尤當通力合作以圖接濟倘時未能驟集巨款准該督撫等向本地富商議息借湊先期解

甘仍各按每月應解之數分期劃還商款所有息銀卽由西征餉內劃扣以期迅速原摺均著鈔給閱看另片奏請已革副都統等發遣等語本日已明降諭旨將吉爾洪額發遣福建依勒和布永成發遣廣東卽著左宗棠將該革員等速行起解咨明各該將軍等嚴加管束將此由六百里諭知左宗棠沈葆楨何璟李瀚章劉坤一丁宝楨文格吳元炳裕祿劉秉璋梅啟照丁日昌李慶翱翁同龢王文韶張兆棟鮑源深升傳諭衛榮光李元華知之欽此

金順劾奏吉爾洪額均有實迹可按片

諭旨吉爾洪額等以帶隊大員豈竟不知法紀何以胆大妄爲至於此極是否金順有不善駕駛操之過激之處弁著左宗棠一併查明據實具奏臣維吉爾洪額等以兵丁久從征伐積勞得官向本不諸律法又以所帶官兵有隸神機營者非情常旂綠各營可比客氣積漸而增與人寡合臣早有所聞金順所劾各節均有實跡可按本非猜嫌忌嫉之私亦弁無過事吹求之意惟指其意圖倡亂目爲亂臣賊子雖當師期已迫所部不遵

調遣急遽之間措詞未免過當而原其本心則固無他  
也謹據實覆陳伏乞

聖鑒謹

奏光緒三年三月初六日

軍機大臣奉

旨知道了欽此

官軍三道並進會克吐魯番兩城摺

奏爲官軍三道並進連奪城隘會克吐魯番兩城大概情形恭摺馳陳仰慰

聖慮事竊自烏魯木齊迪化州兩城俱下卽擬乘勝進規南疆因會攻瑪納斯城凱旋收隊大雪封山未能急進改以今年春融爲師期進兵次第一遵原議總理營務三品卿銜布政使銜西甯兵備道騎都尉世職法福靈阿巴圖魯劉錦棠於三月朔由烏魯木齊踰嶺而南先攻達坂賊巢分軍會攻吐魯番記名提督雲騎尉世

職哈西巴巴圖魯徐占彪由穆家地溝西南進入山排  
接與高武軍分統記名提督博奇巴圖魯孫金彪會師  
鹽池先攻七克騰木接攻關展分下諸城壘以攻吐魯  
番總統高武軍廣東陸路提督騎都尉世職加一級雲  
騎尉世職霍欽巴圖魯張曜由哈密西進以五營交孫  
金彪進駐東西兩鹽池親率大隊繼進疊據張曜徐占  
彪馳報徐占彪會商孫金彪以七克騰木地方爲吐魯  
番門戶築有堅壘賊所必爭應乘其不備迅圖拔取三  
月初五日徐占彪飭提督何玉超宋賢聲總兵黃祖福

率馬步三營度戈壁前進初六夜抵離七克騰木二十里之張家卡賊壘更鼓弛懈何玉超等卽飭步隊勇丁由壘北爬入內外號鼓齊發賊始驚起黑夜倉皇奔逃馬隊邀截於外殺賊頗多初七日何玉超等率隊進攻七克騰木初八日徐占彪督後隊至晡時分三路進攻徐占彪率隊齊至四路猛撲呼聲震天號鼓雷動賊奪門而出徐占彪所部鎗斃紅衣賊目一名羣賊膽落無心戀戰向關展狂奔徐占彪孫金彪督隊急追沿途斃賊約百餘名生擒五名奪獲旂幟鎗械數十件馬十三

匹初九日乘勝進攻關展甫至城邊賊望風西遁兩軍躡剿斃賊三百餘名生擒三十餘名孫金彪所部擒安集延賊二十五名內有賊目一名才米邪斯均訊明斬之得獲鎗械百餘件騾馬二十四頭此三月初六初八初九日連克賊壘收復關展城獲勝之情形也訊據賊供安集延頭目調關展一帶賊眾踞六古慶勝金台等處俟官軍前進併吐魯番守賊與官軍拚死一戰等語徐占彪孫金彪會商率隊分路前進十二日徐占彪行抵魯克沁城賊見官軍至出城迎戰揮馬隊衝之賊



稍卻步隊繼進鎗矛刺賊不能支向西遁去孫金彪至連木沁台壘賊紛紛出竄擒斬數十踉蹌緊追至勝金台該處新築土城一座踞賊數百齊出抗拒孫金彪率馬隊步隊奮威衝擊斃賊甚多生擒數十名內安集延賊二十三名奪獲鎗械數十件兩軍仍會合於哈拉和卓城東守賊倉皇出奔追斬頗眾十三日會師前進行至距吐魯番十里守卡賊併東路敗竄之賊列陣抗拒徐占彪從左路進孫金彪從右路進步隊大呼突陣鎗矛并舉賊殊死鬪乃麾馬隊分兩旁抄襲賊陣始亂

紛紛潰竄兩軍緊追至城邊城賊傾巢出拒敗賊復同  
戈搏鬪正酣戰間道員羅長祐分領湘軍馬步倏自北  
路馳至賊益駭愕不知所爲三軍合勢夾攻斃賊無算  
敗賊向西路狂奔各軍緊追數十里沿途擒斬亦復不  
少怕夏所立阿奇木僞官馬人得乞降軍前孫金彪受  
之送羅長祐訊明處治卽各收隊分駐吐魯番兩城本  
地纏回萬餘跪地乞命羅長祐徐占彪孫金彪遂加撫  
慰令各復業此三月十二十三等日攻拔魯克沁城連  
木沁台勝金台哈拉和卓城會克吐魯番滿漢兩城之

大概情形也劉錦棠三月初一日由烏魯木齊率馬步  
十九營踰嶺而南初三日進攻達坂城卽囑遜營乘賊  
不覺已合長圍分五營交羅長祐帶赴吐魯番會剿其  
達坂城戰狀尙未據稟報前來緣緘牘由烏垣驛站馳  
遞較由吐魯番遞肅遠逾千里不能速也謹將會克吐  
魯番大槩情形先行馳報其達坂城戰事及會克吐魯  
番詳細形容俟劉錦棠稟報到日再行具  
奏合併聲明謹據實馳陳伏祈

皇太后

皇上聖鑒訓示施行謹

奏光緒三年三月二十九

覆陳科屬零匪竄擾摺

再臣承准軍機大臣字寄光緒二年十二月二十三日奉

上諭保英奏科屬賊匪竄擾見在探剿一摺據稱十一月初七日差員松秀等管解官駝前赴金順軍營行抵科布多屬之札哈沁鄂隆布拉克台忽有駝馬回匪百餘名各持洋鎗等械將官駝行裝等項全行搶劫該

駝馬亦被搶去大半等語烏魯木齊瑪納斯各城已次第克復據左宗棠金順等奏賊匪追斬無遺何以尙有洋鎗騎馬回匪恣行搶掠此股賊匪究由何處竄去著左宗棠金順立即探明認真剿捕毋任餘孽竄擾爲患等因欽此臣查上年十一月據前署巴里坤總兵周有才委辦糧局道員王詩白稟稱十月初八九日巴里坤西距穆家地溝十五里沙河子及三泉驛有零騎竄賊旋復遠颺頃據烏魯木齊領隊大臣錫綸由古城來詢及去冬竄擾科布多賊蹤據稱賊祇六十餘騎係由穆

家地溝竄出經木壘河奇台縣進東向科布多嗣又由  
古城進西三台滋泥泉向南山竄歸吐魯番考其月日  
當卽保英所奏十一月初七日竄科布多屬札哈沁鄂  
隆布拉克台搶掠之百餘賊此股零騎實無百餘之多  
其由滋泥泉占畝地中間返竄吐魯番也本年正月據  
管帶靖營馬隊總兵方友升稟報截擊於南山口斃十  
餘賊而奪其馬亦僅稱騎賊數十而曰竊天山自烏魯  
木齊盤折起伏至古城巴里坤哈密一帶山之左爲回  
部右爲準部縣亘二千餘里由烏魯木齊至古城以南

北爲界畫由古城至哈密以東西爲界畫自官軍克復  
古牧地烏魯木齊迪化州昌吉綏來諸城餘賊敗歸南  
路其北路東路運道早就安謐實無成股出犯之事然  
沿山二千數百里逕路紛雜零騎伏伺山梁乘間突出  
劫掠則實有防不勝防者雖分營扼要布置護運道則  
不能兼顧營壘顧營壘則不能兼護運道官運車馱商  
民車馱因而失事者有之上年冬臘之交其患尤甚臣  
增調捷中捷左兩旗步隊及新練精騎兩起馬隊赴巴  
古之交劉錦棠派馬步各營分駐古城迤西一帶嚴爲

防護然後運道漸暢查賊竄北路以南路之達坂托克遜爲南路總要賊竄東路以西路闕展七克騰木鹽池爲來路總要張曜前以東西兩鹽池有營扼紮則巴古中間防務漸可解嚴先飭提督孫金彪帶馬步四營駐之臣前檄飭劉錦棠張曜徐占彪三路進規南疆均排摟而前原爲斷賊來蹤起見見復飭提督鄒金本率捷中旗總兵陳國珍率捷左旗提督范銘率白馬營各步隊提督丁桂智副將王玉林率精騎兩起馬隊及巴里坤鎮標兵丁防護巴古運道其自古城迤西至烏魯木



齊飭提督金運昌率所部卓勝全軍馬步分撓延紮似此防剿并籌布置益密則回通游勇之患可以無虞而前敵各軍無憂後顧所有零騎竄擾科布多屬境布置防剿情形謹據實覆陳伏乞

聖鑒訓示謹

奏光緒三年三月二十九日

軍機大臣 字寄光緒二年四月三十日奉

上諭左宗棠奏官軍會克吐魯番兩城大概情形并派兵分防北路各摺片本年三月問道員劉錦棠等會師

進取南路提督徐占彪及嵩武軍提督孫金彪分道併進疊克七克騰木闢展等處進逼吐魯番城劉錦棠派道員羅長祐帶兵繼至合力夾攻殲斃無算賊向西路狂奔僞官馬人得乞降解散纏回萬餘當將吐魯番兩城收復勦辦尙屬得手劉錦棠由烏魯木齊進兵直攻達坂賊巢已合長圍諒亦不难攻拔見在敗賊旣向西竄自必與逆酋怕夏騰聚託克遜一帶以圖抗拒著左宗棠一面飭令劉錦棠迅將達坂賊巢攻克卽行統軍前進一面飭令張曜督率全軍與徐占彪一軍會商布

置乘此声威速籌進剿以收堵穴擒渠之效其北路巴里坤古城一帶時有零匪出竄左宗棠已撥馬步各隊分路防剿尙屬周密著卽督飭各營認真嚴防遇有竄賊隨時撥剿淨盡毋任滋蔓將此由六百里諭令知之欽此

請 飭催卓勝軍欠餉片

再臣上年奏奉

諭旨飭提督金運昌率所部卓勝馬步全軍西來金運昌冒雪遡征本年二月初七日行抵肅州臣委員點驗

馬步尙屬可用飭休息數日分五起行走自二月十三日至二十一日已全救出關頃據金運昌稟報三月十三日行抵哈密小憩一二日卽踰天山西進計此時已行抵烏魯木齊分布古城迤西各處填防要隘矣惟該軍餉項向由晉皖兩省各認其半晉省半餉欠解無多皖省則尙止解至上年六月金運昌前營皖餉遲乚不到由臣歸化採運局解挑銀五萬兩嗣由甯夏至肅沿途支用及出關發給滿餉通共已發銀十二萬八千餘兩各州縣官局應付糧料柴草車價等費尙不在內而

皖餉絀乏頻催不應督省且有停餉不解之請懸軍邊  
塞轉運萬里卽各省依時起解尙虞遲滯何況欠解數  
月又適臣軍餉源涸竭之時墊無可墊設有接濟不及  
何堪設想合無仰懇

天恩飭山西安撫臣迅速籌解欠餉并依時起解月  
協餉項以資接濟而利戎機大局幸甚謹附片具陳伏  
乞

聖鑒訓示施行謹

奏  
光緒三年三月二十九日

軍機大臣 字寄光緒三年四月十三日奉

上諭前據左宗棠奏籌調卓勝軍以金運昌西來距皖  
愈遠每月半餉難再由皖省解濟由鮑源深與該督分  
任其半當照左宗棠所請諭令晉省籌解半餉皖省毋  
庸撥解茲據該督奏稱金運昌全軍見抵烏魯木齊分  
布古城各處餉項缺乏無款可墊請飭催晉皖兩省迅  
解該軍欠餉并依時起解月餉等語昨據鮑源深奏請  
停解卓勝軍半餉業交戶部議奏見在金運昌移軍西  
進西餉孔亟該督所任一半月餉自應遵奉前旨竭力

籌給晉省應解該軍一半月餉在戶部未經議覆以前  
亦應設法撥解至安徽山西前欠該軍餉銀并著裕祿  
鮑源深迅籌解濟毋稍延緩將此由四百里各諭令知  
之欽此

覆奏移屯實邊摺

奏爲遵

旨覆陳仰祈

聖鑒事竊臣欽奉

寄諭翰林院侍講張佩綸奏請抽調旂丁屯田新疆一

摺據稱烏魯木齊等處亟應興辦屯田以固边防及三  
便三利各情形是否可行并如何辦理之處著左宗棠  
通盤籌畫妥議具奏原摺著鈔給閱看欽此跪聆之餘  
敬仰我

皇上因時損益執兩用中至意感服莫名比將張佩綸  
原奏詳加閱看並酌度事宜求可見之施行要諸永久  
者謹略陳之以備

聖明採擇竊維張佩綸原奏雖本開屯實邊立言而實  
則爲八旗生計愈艱亟籌因時制宜起見謹按八旗生



齒日繁甲分有定

國家以有定之錢糧養無限之丁口勢必有時而窮從  
前舒赫德孫嘉淦富俊英和諸臣先後條陳及之老成  
深謀遠慮固已預爲綢繆而究無成效可睹中外臣工  
且以窒礙多端人情不便爲慮難見諸施行者非無故  
也八旗官兵係出

國初勛裔環衛

京師體制餉精較綠營爲優而營運資生之策則較綠  
營爲絀綠營兵丁餉糧雖薄應名差操之暇可傭雇謀

食手藝營生辭糧退休尙能自食其力入旂之聰明俊達者爲士勇敢強壯者爲兵惟在致身仕途博廉俸爲仰事俯畜之計無官祿者或傳習經蒙教練弓馬以其所能食於人已耳然不習行商服賈之業不知服田力穡之勞不諳匠作工師之技於世之所謂四民者僅可名之爲士而農與工商無與焉日荒於嬉惟慢游自便望其食力行身俯仰足給豈可得哉又况逸豫之久由昏惰而長惡緣才者浸成廢材愚者或流於匪僻不僅飢渴之足爲心害也於是懷久遠之慮者急思有以拯

之而移屯實邊諸議以起然事體終多窒礙人情未免  
疑沮者約有數端八旂子弟扈從入關除駐防各省外  
均萃居都中例禁無故遠出近雖允其游宦四方隨在  
隸籍而或以選補升轉之遲速考試錄取之難易京旂  
視外省爲優未肯舍之遽去一也都居旣久墳墓廬舍  
在焉賴祭產薄田住宅以給餽粥而蔽風雨一旦捐棄  
便致茫然二也少小卽無執業口分而外不名一錢今  
旣離故居而適新土舉目無依縱口分照常支給設有  
窘苦誰與賙恤設有緩急誰與通融三也四民之業惟

農最多亦惟農民最爲勞苦大凡以農世其家者子弟  
自成童後責其牧牛拾糞成人以後習鉏耨耕穫牽車  
扶犁之事故童而習之壯而稱良老以傳家也八旂官  
兵平時未親耒耜未知種植之宜未習農家諸務驟驅  
之隴畝責以爲農之效正恐耕也而餒在其中重煩籌  
濟四也此窒礙疑沮之見於旂籍者也外省民事均責  
成各廳州縣監之以道府董之以兩司而督撫總其成  
今以旂員領旂兵雜民耕作兵與民不能耦居無猜官  
與官難言同舟共濟調停之術偶乖則箕帚鋤耨動感

嫌隙錢穀交涉易啟猜疑誠恐於八旗生計無補而各省地方有司徒增煩累移屯之難一也移旂籍而興屯事遷徙路費及到地修造廬舍製辦耕具採購牛籽糧料一切需費甚繁通值部庫空虛洋防塞防待用孔急且鉅更增此款時絀舉贏中外無從設措移屯之難二也此窒礙疑沮之見於官月者也竊維張佩綸原奏移屯實邊諸策爲

國家節經費爲入旗裕生計爲邊圉固封守洵爲濟時要務終難廢格不行部臣疆吏固在奉公豈宜苟安且

前置遠歎於不顧如果盡心協力罷勉圖維行之以漸  
持之以恒亦未有爲其事無其功者不族世居都下本  
取居重馭輕之義今議散之四陲移腹心之寄置諸股  
肱於初制似有未協新疆距

京師萬里而遙遷移需費甚鉅創行之始百務艱難到  
地興屯數年之間耕穫未能遽觀成效臣之度隴也首  
以屯田爲務師行所至相度形勢於總要之處安設營  
卡附近營卡各處戰事餘閒卽釋刀仗事鋤犁樹藝五  
穀餘種蔬菜農功餘閒則廣開溝洫興水利以爲永利

築堡寨以業遺民給耕具籽種以調貧苦官道兩旁種  
榆柳垂楊以廕行旅自臣以下至營哨各官於駐營之  
地日巡行省視以勞來而勸勉之時逾八九年流亡漸  
復客作漸集所有兵屯之地盡付之民緩催科而急儲  
峙白涇州以抵嘉峪大道兩旁各廳州縣附近地方居  
然井竈相望而鄉野則尙未能遽復舊觀蓋隴上本土  
曠人稀邊塞又多砂石不毛之地也所以多費時日稍  
著薄效者由微臣家世寒素耕讀相承少小從事隴畝  
於北農南農諸書惟喜研求躬驗而有得所部楚軍向

用農家不收游手其將領又多由傭耕作苦而來故以  
其所習課其所能不煩教督而自勸至所屬蜀豫淮各  
軍則固未能一律繩之若以八旗不士不農之子弟散  
之邊陲驅之隴畝竊慮於八旗生計無所裨益而於  
國計邊儲則又有所損臣固不敢以爲然再四思維若  
本張佩綸之意而舉行

畿輔水利不但無其損且有其益請得而畢陳之直隸  
水利自虞集始徐貞明潞水客談言之至爲詳盡明代  
或作或輟迄鮮成功



國朝畿輔水利四案如怕賢親王之苦心經畫固已功  
在民生而誦其遺烈者惟廣平府屬磁州溝洫依然歲  
獲豐稔餘則舊蹟湮沒難以覆按矣論者謂當時議興  
水利爲種秔稻計壯農方以霽體塗足爲苦又以稻非  
食用所需銷售不若麥豆雜糧之廣輿情不以爲便故  
法良意美終扞格而不行若再行溝洫之政聽民自種  
麥豆雜糧則因所利而利之其被潤澤而大豐美傳之  
久遠者當不僅磁州已也今直隸旱澇頻仍水利之興  
修宜亟八旗子弟雖難驟卽田功但令其親畚鍤開濬

溝洫當不以爲苦且散布於畿輔之間工作餘閒仍可  
演習武藝有事一呼卽應於居重取輕之義更有攸宜  
而操作旣勤執業專而筋力健漸復曩昔敦龐純固之  
風無難異時頗牧之儔或可仍於禁旅求之矣其天姿  
穎悟能讀書者聽其照舊應試捐納官職者隨時分發  
各省試用較見行事例而又寬之其次發赴各機器局  
學習製造增益其所不能上者可望異時專門名家之  
選下者執藝事以食於人不至悠忽無成坐廢五穀是  
爲八旗籌生計之所從出於士之外增農與工兩途生

計固可裕也直隸郡縣均

畿輔近地遷移之費無多旂兵每月餉糧應卽由神機  
營直隸總督分給其由神機營派出者神機營各以其  
應得口分照舊開放由八旂派出者直隸總督酌提三  
口釐稅及酌撤客軍騰出之餉照神機營餉章一律開  
放神機營與八旂旣各撥官兵移屯直隸先與水利該  
官兵等每月應劃留若干爲贍養家口之需若干爲本  
身赴工食用衣服之費應由神機營八旂傳詢明白酌  
定以歸畫一其人數多寡神機營與八旂約略相等間

起赴工到工則專由直隸總督遴派官委管東分段謀  
功獎勵責情與齊民等神機營與八旗都統不復過問  
庶幾心志定而工作勤自有成效可期也迨直隸水利  
漸興八旗子弟漸習勞苦工作風氣漸開責其長爲農  
夫亦將安之若素直隸直東荒隙地畝固可就近安插  
作爲世業卽山西陝西甘肅迤北地方水草豐美可耕  
可牧之區亦可議漸次移屯矣至新疆土曠人稀地多  
饒沃張佩綸原奏尙有徵引未及者臣前聞故雲貴總  
督林則徐當道光時大興伊拉里克水利前伊犁將軍

曾奏請加新賦二十萬兩有奇憤其取之太多今肅其  
地在吐魯番托克遜之間上名亦拉里木田甚多已屬  
劉錦棠張曜訪察其詳具報大抵東自木壘河起逾古  
城濟木薩而西三台滋泥泉阜康抵迪化州昌吉綏來  
再西至伊犁壤地肥潤種一石可獲數十石較之巴里  
坤哈密各城磽瘠薄收奚翅數倍方今新疆北路除伊  
犁外已一律肅清漢回土著子遺僅存屯務難以復舊  
誠移八旗丁壯屯於新疆事之便利勢之可乘無踰此  
者特慮以未習農務之人驟處之艱難新復邊遠閭絕

之地於生計未能裕於

國計未能節而邊防亦未能藉以爲重不但勞費可惜  
已也若先修直隸水利徐議移屯新疆似於事體尙無  
窒礙於人情亦免疑沮

諭旨飭臣通盤籌畫敢不披瀝愚忱一敬陳之可否也  
飭下神機營王大臣入藩部統會同戶部廣諮博訪定  
議具

奏以期妥慎伏乞

皇太后

皇上聖鑒訓示施行

奏 光緒三年三月二十九日

軍機大臣 字寄光緒三年四月十三日奉

上諭另摺奏議張佩綸條陳移屯實邊一摺已諭令  
李鴻章等體察情形妥議具奏矣欽此